

續
文
獻
通
考

續文獻通考卷之三十四

皇明進士雲間王圻纂輯

國用考 宋遼金

宋

宋高宗三十一年戶部侍郎劉岑等乞借江浙荆湖等處路坊場淨利錢一界計錢三百八十萬緡以備軍賞限半月足許之

按宋史言國朝混一之初天下歲入緡錢千六百餘萬太宗以爲極盛兩倍于唐室矣其後日增歲廣至熙豐間合苗役市易等錢所入乃至五千餘萬渡江之初東南歲入猶不滿千萬上供纔二百萬緡此祖宗正賦也

呂頤浩在戶部始創經制錢六百六十餘萬緡。孟庾爲執政又增總制錢七百八十餘萬緡。朱勝非當國又增月椿錢四百餘萬緡。紹興末年合茶鹽酒筭坑冶權貨糴本和買之入凡六千餘萬緡而半歸內藏。昔時中都吏祿兵廩之費全歲不過百五十萬緡。元豐間月支三十六萬。宣和崇侈然後支百二萬。渡江之初連年用兵月支猶不過八十萬。其後休兵寢久用度滋益。戶部嘗患無餘及軍興遂復有此請。

三十二年川陝宣諭使虞允文總領四川財賦王之望自利州往會之先是王之望數以軍興費廣爲言朝廷令勸民戶獻納之望因是親至梁洋諭豪民使之輸財焉。

殿中侍御史吳芾言大農之財一歲所入幾五千萬而內藏激賞不與焉會其多寡比景德全盛時十增其四地不足而賦加多則取于民者已盡不可以復求矣惟當痛節浮費蓋今天下之兵內外何啻三十萬大農每歲養兵之費幾十之九若更加募何以贍之今欲兵之足莫如核實不得令虛張人數揀其銳驍汰其疲弱使人皆可用則官無費財是一舉而兩得之也禮部侍郎黃中言足食之計在于量入爲出今天下財賦半入內帑有司莫能計其盈虛請悉以歸左藏上善之孝宗隆興元年詔昨議臣寮權借職田添助國用深慮吏無圭租何以養廉前降指揮更不施行二年初給度

牒二萬道付諸路出鬻每道收錢三百貫侍御史周操言今來正是起催折帛夏稅之時若添此一項愈見緊急乞量降五千有旨先次給降一萬道候均賣盡日別取指揮上謂輔臣曰聞臨安所科已自紛擾不如且已之十月詔內藏庫支借銀一千萬兩付戶部支遣日後令本部撥還 乾道二年左司諫陳良祐奏今之言利者多要生財生財乃所以病民國用愈見不足願取見一歲賦入之數其取于民者已過則從而蠲免之以寬民力取見所養官吏與兵之數其可省者從而省之常令財用十分以七分養兵與官吏三分以備非常如此則上下兼足上曰朕常有志放免和買及折帛等錢

以寬民力但如今未暇良祐奏舊來本無此等錢皆是
軍興時科取講和之後依舊不除今取于民者竭矣若
節制國用令出入有度稍省蓄儲即可行陛下之志矣
上曰因卿之言當定經制 三年上降出御筆云自後
宮禁內人并百官將校軍兵諸司人每月初五日國用
房開具前月支過已上五項請給數目并雜泛支用造
冊進呈便從此月爲始外諸路軍馬可降式樣付諸路
總領逐月開具自此遂爲定式 時上謂輔臣曰蔣叅
政理會財用已尋見根源初蔣芾奏云方今費財最甚
者無如養兵近見陳敏揀汰二千人戚方揀汰四千人
夫汰兵固良法然今日之弊多是有官人與之外任依

舊請券錢又添供給雖減之於內添之于外亦未見其益既減六千人必又招六千人填額則是添六千人耗靈財用矣契勘在內諸軍每月逃亡事故常不下四百人若權住招一年半內可省三百八十萬貫俟財稍足可遂招收強壯訓練而用之不惟省費又可兵精因奏紹興以來初分五軍并內外諸軍分合添減之數上以爲然故有此宣諭 四年度支趙不敵言方今一歲內外支用之數大槩五千五百萬緡有奇又以一歲所入計之若使諸路供億以時別無蠲減拖欠場務入納無虧則是以支一歲之用不闕然賦入之科名猥多分隸于戶部之五司如僧道免丁常平免役坊場酒課之類

則左右曹掌之如上供折帛經總無額茶鹽香礬之類
金部掌之度支則督月椿倉部則專糴本催理雖散于
五司悉經於度支籍之卽古人量入爲出之義則度支
一司安可以不周知所入之數也臣因置爲都籍會稽
窠名總爲揭帖事雖方行簿書草具而條目詳備固已
粲然易考欲望付之本曹自茲爲始歲一易之庶幾有
司得以久遠遵行不惟財賦易以稽攷抑使胥吏無以
容奸從之 是歲湖廣總司申江鄂襄三處軍馬歲約
用九百八萬四千餘貫 五年起居郎林機論諸處有
羨餘之獻皆移東易西以求恩倖上曰今之財賦豈得
有餘今後若有獻朕當却之 七月上曰戶部所借南

庫四百萬緡屢以諭曾懷不知有甚指準撥還虞允文奏不過指準折帛耳梁克家奏今左帑無兩月之儲大段急閼不可支吾虞允文奏有兩事其一給典帖其二賣紙鈔上曰此兩事旣病民且傷國體俱不可行更令別議以聞 四川總領所奏昨緣本路措置備邊椿積遂申朝廷乞降空名度牒仍拘收四川事故僧道度牒繳納訖欲乞將已賣過四千五百道作第一料所有去年十二月內已降二千道今更乞貼降二千五百道奏作第二料下本所出賣拘收價錢搬赴宣撫司專充備邊椿積非遇緩急分文不敢支用從之 八年詔官田除兩淮京西路不行出賣應諸路沒官田產屋宇并營

田並措置出賣以戶部左曹郎官王之諸路委常平司其錢赴左藏南庫令置庫眼椿管 淳熙六年提領封椿庫閣蒼舒奏狀封椿庫共管見錢五百二十萬餘貫年深有斷爛之數乞拘收西庫綱運見錢對兌支遣其斷爛錢貫給工索之費上曰錢積之久必致貫朽趙雄等奏陛下儉德冠古帝王未嘗一毫妄取于民而府庫充足上曰朕不敢毫髮妄用所以有此以待緩急之用實前此所無 十年宰執奏封椿庫見管錢物已及三千餘萬緡上曰朕創此庫以備緩急之用未嘗敢私也先是上以諸路財賦浩繁令兩侍郎分路管認是年王佐爲尚書又請于次年四月將諸路監司守倅所起

上供錢比較以定賞罰自是罕有拖欠 十三年淮東
總所具到鎮江所部大軍庫見錢會子內依去年例取
撥一千萬貫付封樁庫收納淮西總所具到池州大軍
庫見錢會子五十萬四千五百五十五貫有奇詔令于池州
酒息會子內取撥二萬貫就本州總數樁管湖廣總所
具到襄陽府大軍庫見錢會子二十一萬九千九百二
十一貫有奇詔于內取撥會子一萬貫就本府認數樁
管非朝旨不得擅行支使

光宗紹熙二年詔脩紹熙會計錄先是秘書郎鄭湜轉對
爲上言今黃老三宮衛卒動以百數外戚家廟防護之
兵多于太廟額外將校之俸錢半於正額外庭百執之

費不足當閣門醫職近侍之半請明詔大臣裁定經費
上自乘輿下至庶府除奉宗廟事兩宮給兵費之外一
切量事裁酌罷其不急損其太過戶部亦請稽攷內外
財賦置紹熙會計俟見大槩之後命戶部宰屬同共詳
議而一二大臣公心叶意爲之斟酌以其所減損以與
民因命戶部尚書葉翥等同爲之後亦未聞有所捐也
三年四川經理總制錢額四百五十餘萬緡共一百
三十餘萬緡贍軍一百三十四萬緡應副湖廣總領所
一百六十九萬緡上供餘六萬緡諸郡支用上卽位因
劉光祖之請捐湖廣三年錢四百六萬八千緡對減課
酒重額錢卽此四川經理總制錢也然四路憲司歲撥

湖廣錢實止六十萬緡而已又以買發物價計之折閱中半僅爲三十萬緡是歲楊輔總蜀計又樽節三十萬緡以益之 寧宗時駕部員外李鳴復奏日記曰國無九年之蓄曰不足無六年之蓄曰急無三年之蓄曰國非其國也陛下試思今之爲國其有九年之蓄乎其無九年之蓄乎今日之國計版曹實司之分版曹之責任者內則司農外則四總領是也臣家于蜀嘗究觀蜀之總計矣蜀賦總入之數以緡錢計之歲約二千二百餘萬向也和議未絕烟塵不警尚可支吾今也邊戍倍增用度益廣每難酬應朝廷以其數之不敷歲降七百萬緡以助其費此其大畧也臣邇者忝承農扈亦嘗究觀

農寺之出納矣農事歲催之額米以石計凡一百三十餘萬錢以緡計凡一百六十餘萬以旣入之錢糴未足之米總約二百餘萬而後可以敷歲支之數此亦其大畧也蜀之所產未足以供一歲之用農寺之所催僅可以爲一歲之出求其儲積以備不時之須蓋無有也類而推之湖廣總計猶是也淮東西總計亦猶是也此所謂經費之外卒有緩急取辦於朝廷之樁管散在他所者不得而知也其米斛之在京城者可得而言也曰兩豐儲曰中下界其倉凡四以石計之總不過二百萬水旱之科撥歲寒之賑濟閏月之貼降皆於焉取之此猶曰常程也最可慮者江西湖廣粒米狼戾之地昔號樂

土今爲盜區虎豹橫行鴻雁來集賦輸不入綱運轉虧
諸總所以匱乏昔常截大農之綱以周其急矣寇賊未
平漕運未至則其告匱必不能已也農事以貼降請嘗
撥椿管之數以償其虧矣截撥之令不容不行則其求
償又當與之俱也移東而補西已非策之得已若捉衿
而肘見不知計又安施識者殆凜凜焉可不急爲之圖
也哉去歲浙右之地皆以稔告朝廷和糴視舊有加廟
筭深長動中事會獨惜夫任是責者不務大體競爲淺
謀錙銖必較則負販之徒安能奔走以聽命網羅文設
則藏積之家不免懷疑而待價名爲和糴實類科糴始
於起時終於失時然猶幸其可以爲國計之助他不足

問也今日之勢迫矣所利有限而所以仰給者無窮將
何以爲計臣願陛下軫念事變之來急爲根本之慮其
於時政實非小補 知成都曹彥約奏曰臣竊謂今日
財用之弊不可不深致意也問之朝廷則窘於應辦問
之州縣則窘於支遣以爲在總餉歟則今日之總餉非
昔比也以爲在戎司歟則今日之戎司不一律也臣始
守漢陽軍當湖北最窘處適虜騎入境催科縮手猶且
支遣解發不改常度是十年以前州郡猶可爲也越二
年而攝事湖廣總餉乃見其不可爲矣搬江州之銀券
以足襄陽運德安之鐵鑄以實隨棗移東就西截短補
長支撐數月僅不廢事及正官交割後其用益窘有請

于朝久無畫降其人至投繯自殺以救得免矯制展官會界分二百萬乃始集事是八年以前總餉已不可爲也又二年而得守長沙亦當應辦之時朝廷之科撥未至而諸郡之綱運尚闕帥司移文本州未免那兌其間小小名色不復責償值朝廷稱提官會則多出庫錢以便百姓然而二年之後比交割元數猶有增羨是七年以前州郡猶可爲也又二年而得節制利州兼領郡事則知利州之事已不得如長沙時矣用兵之後事力更改有節度使寄居奉祠則歲費增數千緡矣有總管鈐轄路分添差作闕則歲費又增萬緡矣黽勉盡瘁僅了元額又二年而得守豫章則知豫章之事又不得如利

州時矣調發既多則酒課不辦權場不通則稅課斷減雖樽節用度不致虧數而其所以爲經費者甚岌岌也戎司之事雖不曾親歷而利州置司所在亦或剽聞矣管軍二萬四千人而交承錢物不過二三萬緡支吾不行至有奪前政宅庫之物以爲公用者被旨巡邊迴避戍卒支犒有以葬妻爲名行於小路者是數年以來不特州郡不可支遣而爲戎司者亦有窮陋至甚者矣此其故何也朝廷之財臣不得而盡知但見招募軍兵修築城壘額外和糴遍滿天下是用財之處比前日爲多也楮券不足加以增印度牒不足助以告勅是生財之路比前日爲廣也國用司本意所以蓄藏幣之數耳沒

人平民漸生枝葉安邊所本意所以籍權奸之產耳變
及征權頗動觀聽大寧監之鹽利已竭而轉運司之增
羨不已宏昌之馬價未償而茶馬司之獻納不廢是取
財之道比前日爲苛也民力極矣不可以增賦矣上下
煎熬一至于此將何以救之哉故臣嘗論之天下之財
未足以了天下之用位置分畫要得其所截然條目不
可移易成周之財以九賦歛之以九式均之自邦中以
至幣餘各有常賦自祭祀以至好用皆有常式漢以吏
祿公用賦于民不以封君湯沐爲經費唐以世業口分
授於民不以留州送使爲上供古人經理天下大率如
此本朝列聖立法尤更詳備紹興隆興之間虜寇犯順

朝廷調發雖費若河海而州縣常賦無窘迫之態百姓
安業無怨懟之患大郡交割之數有緡錢之積多至百
萬者小郡見管亦有數十萬者若民間積粟之富則又
往往稱此上戶多者十萬斛中產亦數千斛上恬下熙
相安于無事當淳熙紹熙時其俗未改近者公私之計
窮陋萬狀皆云開禧以來兵議纔起取常平義倉以供
綱運則救荒無先備撥官告度牒茶鹽引爲糴本則交
易無見價軍器之有製造弓兵之有調發椿積之有水
脚招軍之有賞犒非時泛用一切取辦荷朝廷出豁雖
許於交承錢內支破而州郡積漸至無遺蓄矣調發有
劈券則月糧有倍費功賞有轉資則食錢有添請拆洗

有往來之費暴露有特喝之賞便宜從事一切取辦若朝廷應副稍不如期而轉餉移兌殊虧舊額矣戎司之事雖不欲窮問本末然而窘於開禧之後而不窘於開禧之前亦必有以致此也望陛下與大臣議立爲定制以官兵之常數責州郡而不責以非時之須以歲時之常用責諸司而不責以不測之費總所之有應兌者悉與拋降使之任乏典之罪課利之有增羨者不許申奉使之備循環之費其一切調發之用則朝廷自任其責當科降者卽與科降不必徒爲勘究當支撥者速與支撥不許無故滯留如八月當和糴則七月先科降十月當調發則九月先支撥久監司郡守之任以寬其迎送

嚴刻剥羨餘之禁以沮其觀望使有志者可以募士可以養兵謹重者可以備水旱可以修城郭設有緩急亦得以仰成而取辦至於戎司之事尤當知其事力寬其利源上可以慰其心下可以饗其士伸縮自如可以展布其爲氣象有太一盛觀矣若夫大農之不繼則在陛下有以圖回而幹旋之耳側聞紹興和戎則以內帑了歲幣中間用兵則以內帑激將佐聞高宗聖訓以爲內帑所有專以用兵宮中則未嘗妄費也烈祖中興之法昭若日星可不舉而行之乎雖然又有一說焉軍政在戎帥則總領之奉使者爲贅員不可不察也蓋軍政在戎帥則民事不

得而與知命人以總領其事無可疑者軍政在宣制則財賦之輕重當出其手總領之職特一有司耳今欲招一軍而聽命於朝論移一屯而分券於總所使朝論疲於應酬視爲常事總所耻于督辦通相萋菲宣制之事臣以爲不可爲也誠能使四總所之財聽命於宣制如張浚之用趙開就糧捐運惟意所欲如胡世將之處吳玠不膠柱調瑟不鑿空取辦或欲減一軍以寬用度或欲增一軍以臨邊塞効用之有奇傑者可陞爲背覓民兵之有精悍者可選爲効用審緩急之宜量出入之數使爲宣制者得以專之而他司不得以撓之非有大變革不必俟命而後行非有大調發不得乞錢而後舉則

州縣制總皆得以自用其財而大農之財亦可得而稽考矣其或食閭外之祿不肯專閭外之政有功則歸利於已有誤則歸過於朝微有措畫則乞錢以示重費稍有寬餘則回納以示廉儉今世之人皆以爲善處已矣以臣愚觀之直謂之不任事可也臣既有微見不敢有隱於陛下惟陛下宥其僭

理宗端平元年都省言近來戶部財賦會計不明用度無節詔令尚書省計簿房置局稽攷委都司官同樞密院編修官編類端平會計錄仍令條具來上權置檢閱文字二員尋差宣教郎趙與時承事郎趙汝暨時臣寮奏古者冢宰制國用必於歲杪視年豐耗量入爲出願

陛下特命宰臣兼制國用以參知政事同知使人主不得越制過取有司不得違制擅支上下一心君臣同德會計有局檢閱有官庶幾財用日益則國用濟矣從之

侍御史李鳴復奏畧曰古者冢宰制國用必於歲之杪視年之豐耗量入以爲出夫量入爲出一有司事耳而必爲之制必歸之冢宰何也蓋天下之財其入也有豐耗之不當則其出也有增損之各異權其多寡之數酌其費用之宜是之謂制此制一定雖人主不得越制而過取有司不得違制而擅支制與不制之間而國計之盈虧民生之休戚天下之理亂係焉此豈一有司所能辦哉周官天官之屬六十宮衛之賤士則領之魚腊

醢醢之微物則領之次舍幄帶裘服之末用則領之以至官寺嬪御使令之冗役則又領之是王宮之事無貴賤無巨細皆隸之冢宰也國朝財用雖掌之三司使而制國用之說憂國者每每及之張方平論支費數廣則乞下中書樞密院審加圖議范鎮論財匱民困則乞使中書樞密院通知兵民財利大計至孝宗乾道間則又特命宰相帶兼制國用使叅政同知國用事當時雖九重邃密之地亦未嘗不朝夕在念也今日之財用匱矣問之戶部戶部莫之知問之宰相宰相亦莫之知戶部不以白宰相宰相不以告陛下府庫已竭而調度方殷根本已空而蠹耗不止廟堂之上縉紳之間不聞他策

惟添一捺紙局以爲生財之地窮日之力增印楮幣以爲理財之術楮日益多價日益減號令不足以起其信繼以稱提稱提不足以強其從重以估籍估籍之令行而民不聊生以往者會計有局檢閱有官在上者若致思於國計矣然置郵旁午徒撫空文歲月遷延莫究實效是雖爲而何益論造楮有疏論省費有數在下者若致憂於國用矣然位卑言高聽之者未必信事大體重聞之者未必行是雖言而何補臣愚欲 陛下遠體周人制國用之遺意近法孝宗任宰執之成規明詔大臣條陳經畫何道而可以足一歲之用何術而可以致九年之蓄所入不足於何而取辦所出不敷於何而減損

揆事理之當然度時宜而裁酌當必有轉移關闔之用
以副陛下之責望者 嘉熙元年正月初置財用司

按太祖太宗設三司主計有度支之目又有提舉帳司
磨勘理欠等司皆爲會計財用也唐李吉甫嘗錄元和
國計著爲成書宋景德皇祐治平熙寧元和主計者皆
有錄上之其戶口之籍輿地之圖調度之多寡錫予之
厚薄莫不畢具各內藏與天下封樁非三司所領者不
與焉元祐會計錄蘇轍所著蓋取元豐八年會計之實
而別其五曰收支曰民賦曰課入曰儲運曰經費謂一
歲之入不足以供一歲之出且論宗室爲節度防禦觀
察者數倍於皇祐百官爲大夫者數倍於景德稍裁減

宗室及百官任子恩澤見任者無損方來者有限亦至計也自罷三司理財既無法而渡江以來典籍散漫會計之事一切委而不講苟支目前議者惜焉 淳祐七年四月詔今歲明堂惟事神儀物諸軍賞給悉循舊制其乘輿服御中外用度並從省約令有司條具以聞

度宗咸淳三年趙殿院奏臣聞用度約者國必興用度侈者國必亡今東南視渡江初疆宇尤狹而又強敵臨邊將士之費視昔百倍自非中外浮費痛戒樽節一旦財盡其能國乎上曰此疏極關治體便可施行

遼起朔漠經費皆不可考惟日有宴月有賜賜之多者銀至二三千金又鞍馬衣疋佐之然亦不至告匱豈防邊

之費既省而又藉宋人以爲外府與

金

太宗天會十一年黃龍府置錢帛司

熙宗天眷元年命少府虞彥倫營建宮室止從儉素 皇
統七年詔減常膳羊豕五之二 海陵正隆時恃其強
欲大肆征伐以一天下乃造戰船於通州又遣使分詣
諸道總管府督造兵器又造汴宮修燕城民不能堪箭
翎一尺至千錢村落間往往椎牛以供筋革至於鳥鵲
狗彘無不被害者

世宗大定二年詔減御膳及宮中食物之半 六月詔出
內府金銀給征契丹軍用 八年正月謂秘書監移刺

子敬等曰昔唐虞之時未有華飾漢惟孝文務爲純儉
朕於宮室惟恐過度甚于興修卽損宮人歲費以充之
今亦不復營建矣如宴飲之事近聞太子生日及歲元
常飲之往者亦止上元中秋飲之耳 八年五月詔工
戶兩部自今宮中之飾並勿用黃金 十四年十一月
諭尚食局品味太多徒爲虛費自今進可口者數品
二十年正月命歲以錢五千貫造隨朝百官節酒及冰
山燭藥炭視品秩給之 時叅知政事梁肅論生財舒
用八事一曰罷隨司通事二曰罷酒稅司拘欄人三曰
天水部王本族已無在者其餘皆遠族可罷養濟四曰
裁減隨司契丹吏員五曰罷權醋以利予民六曰量減

鹽價使私鹽不行民不犯法七曰隨路酒稅許折納諸物八曰今歲大稔乞廣糴米麥使錢貨流出上曰趙氏養濟一事乃國家美政不可罷其七事宰執詳議以聞二十六年十二月上謂宰臣曰朕年來惟以省約爲務常膳止四五品以厭飲之比初卽位十減七八宰臣曰天子自有制不同餘人上曰天子亦人耳枉費安用又曰朕日膳亦減省嘗有一公主至而無餘饌可與朕欲日用五十羊何難哉慮費用皆出于民朕不忍爲也二十七年三月諭宰臣曰國初風俗儉約居家惟衣布衣非大會賓客未嘗輒烹羊豕朕常念當時節儉之風不欲妄費凡宮中之官與賜之食者皆有常數

時自奉儉約其賚臣下甚厚詳具於左 初年賜與宋
交兵陣亡軍士賻錢三十貫鳳翔尹字本魯定方賻銀
五百兩重綵二十端猛安三百貫謀克二百貫蒲里衍
一百貫權猛安二百貫權謀克一百五十貫權蒲里衍
七十貫 紇若烈志寧以功賜玉杓及黃金五百兩沒
後賻金一千五百兩重綵五十端絹五百疋 僕敬揆
以功賜銀一千五百兩重綵五十端絹五百疋 徒單
合喜以功賜銀一千二百五十兩重綵幣帛有差 完
顏守道以功賜銀一千兩重綵五十端絹一百疋 擢
兀帶賻銀千兩重綵四十端絹百疋 思敬以功賜金
百兩銀千兩重綵四十端 納合椿年賻金二千兩綵

百端絹千疋錢千萬 烏延查剌以功賜銀三百兩重
絲二十端 獨吉義以功賜金五十兩銀五百兩 阿
魯補有功爲海陵所殺賻金五百兩重絲二十端絹三
百疋 張浩賻金千兩重絲五十端絹五百疋 宗憲
賻銀一千五百兩重絲五十端絹五百疋 永元賻銀
三百兩重絲十端絹百疋 榮王顯賻銀千兩絹四百
疋 殼英前後以功被賞者金二百五十兩銀六千五
百兩絹八百疋馬三百十有四匹羊六千五百頭奴婢
一千三百人 劉致赴外任賜廐馬金帶絲十端及卒
賻銀三百兩重絲三十端 光慶賻銀三百兩重絲十
端絹百疋 二十九年五月

章宗已
即位

詔罷送宣錢今後

諸護衛考滿賜官錢二千貫 六月罷送赦禮物錢
明昌五年四月詔自今筐檣床榻之飾毋以金玉 六
年命減萬寧宮陳設九十四所 承安元年十二月遣
提點太醫近侍局使李仁惠賜勞北邊將士授官者萬
一千人授賞者凡二萬人共用銀二十萬兩絹五萬疋
錢三十二萬貫 二年四月尚書奏比年北邊調度頗
多請降僧道空名度牒紫褐師德號以助軍儲從之
六月詔罷瑤光殿工作 四年三月尚書省奏減親軍
務衛軍額及太學女直漢兒生員罷小學官及外路教
授以省俸給詔學校仍舊武衛軍額再議餘報可 五
年三月罷獄空錢

衛紹王崇慶元年五月詔賣空名勅牒

宣宗貞祐三年三月京師大括粟 又遣叅知政事高汝

礪往河南便宜措置糧儲至九月復命往陳州規畫

甲戌借平陽民租一年裁損宮中歲給有差 興定三

年四月高汝礪請備防秋之糧宜及年豐于河南州郡

驗直立式募民入粟上與議定其法行之 五年十一

月諭大官減損食品

哀宗正大三年正月詔尚書省議省減用度 十一月詔

諭陝西兩省凡戎事三品以下官聽以功過賞罰付銀

二十五萬兩從其給賞 六年七月罷陝西省軍中浮

費 天興元年八月括民間粟尋詔罷括粟以進獻取

之 九月以榜召賣放下年軍須錢上戶田租如之

辛亥罷貧民進獻糧再括京城粟 時元兵圍汴京城
乏食前御史大夫內族合周復與進用建言京城括粟
可得百萬餘石朝廷信之權叅知政事與左丞李蹊總
其事先令各家自實壯者存石有三斗幼者半之仍書
其數門首敢有匿者以升斗論罪京城三十六坊各選
深刻者主之內族完顏久住尤酷暴有寡婦二口實豆
六斗內有蓬子約三升久住笑曰吾得之矣執以令衆
婦泣訴曰妾夫死于兵姑老不能爲養故雜蓬糶以自
食耳非敢以爲軍儲也且三升六斗之餘不從竟死杖
下京師聞之股栗盡投其餘于糞溷中或白於李蹊李

蹊擊麀白之叅政其人卽白合周合周曰人云花又不
損蜜又得成予謂花不損何由成蜜且京師危急今欲
存社稷卽存百姓耶當時皆莫敢言然所括不能三萬
斛而京師益蕭然矣時汴城圍急內外不通米一升至
銀二兩殍屍相望縉紳士女多行乞於市至有自食妻
子者諸皮器物皆煮充饑貴家第宅市樓肆館皆撤以
爨時金主欲東奔乃發府庫及內府器皿宮人衣物
賜將士二年九月括蔡城粟時哀宗奔蔡城又乏食
故也

按金太祖肇造減遼租稅規模遠矣熙宗海陵之世風
氣日開兼事遠畧君臣講求財用之制切切然以是爲

先務雖以世宗之賢儲蓄之志未嘗一日而忘章宗彌
文甥與邊費亦廣食貨之議不容不急宣宗南遷國土
日蹙汚池數畧往往而然蓋法之初行惟恐不密言事
者謂其厲民卽命罷之罷之未久會計者告用乏又復
舉行其罷也志以便民而民未見德其行也志以足用
而用不加饒及其亡也括粟欄糴一切掊克之政靡不
爲之加賦數倍豫借數年或欲得鈔則豫賣下年差科
高琪爲相議至權油進納濫官則輒受空名宣勅或欲
與以五品正班僧道入粟始自度牒終至德號綱副威
儀寺觀主席亦量其貲而鬻之甚而丁憂鬻以求仕監
戶鬻以從良進士出身鬻至及第又甚而叛臣劇盜之

効順無金帛以備賞激勸以王爵固結其心重爵不繼
則以國姓賜之名實混淆倫法數壞皆不暇顧國欲不
亂其可得乎迨夫宋絕歲幣而不許和貪其淮南之蓄
謀以力取至使樞府武騎盡於南伐說可時全之出初
志得糧後乃尺寸無補三軍覆亡元帥壓境兵財俱困
無以禦之傳曰作法于京其弊猶貪作法於貪弊將若
何使其初用唐之永業口分以制民產倣其租庸調之
法以足國用何至百年之內虛耗如此與其弊在于急
一時之利踵久壞之法鄙遼儉朴襲宋繁縟之文懲宋
寬和加遼操切之政故也

續文獻通考卷之二十四終

續文獻通考卷之三十五

皇明進士雲間王圻纂輯

國用考 元

元

世祖至元六年詔鞍靴箭鏃等物自今以後不得以黃金
爲飾 十年河南宣慰司言軍興轉輸煩重宜賦軍匠
諸戶權助財用從之 十四年詔禁中出納分三庫內
藏主御用寶玉遠方珍異右藏主金銀只孫左藏主綺
羅縑布 十七年秋八月帝如上都以每歲聖誕節及
元辰日禮儀費用皆歛之民詔罷之 二十九年冬十
月右丞相完澤言一歲天下所入凡二百九十七萬八

千三百五錠其中有未至京師而在道者有就給軍旅及造物料館傳俸祿者自春及今凡出三百六十三萬八千五百三十四錠出數已逾入數六十三萬一百三十八錠矣今後賜諸近侍亦宜有節帝嘉納之 十一月中書省臣言自正旦至二月中旬費五十萬錠臣等兼總財賦自今侍臣奏請賜資乞令臣等預議帝是之 十二月桑哥言有分地之臣例以貧乏爲辭希覲賜與財非天墜地出皆取于民苟不慎其出入恐國用不足帝曰自今不當給者汝即畫之當給者宜覆奏朕自處之 時趙天麟上策曰臣聞堯居茅屋禹戒雕牆周王之卑服漢帝之皂綈非徒以質素之本心亦以杜人

民之奢汰也至元年間都堂議得民間喪葬紙房金銀人馬并綵帛衣服帳幙等物截日盡行禁斷又准中書省奏定到官民嫁娶聘財筵會等事此皆先帝慎儉德以懷永圖推其餘以化下民也今天下之人或有見衣服鮮明騶從翹楚者從而羨之見衡門安志樂業循常者從而笑之至權吏濫官豪富子弟以驕淫相誇以奢靡相尚以節約爲耻以貞廉爲愚既不副于上心又重傷於家業延及士庶轉相倣倣習以成風伏望陛下體先帝之意禁王公大人之奢侈則天下之官民不令自從矣

成宗元貞元年中書省臣言朝會賜與之外餘鈔止有二

十七萬錠凡請錢糧者乞量給之仍定西平王奧魯赤
寧遠王闊闊出鎮南王脫歡及也先帖木兒大會賞賜
例金各五百兩銀五千兩鈔二千錠幣帛各二百疋諸
王帖木兒不花也只理不花等金各四百兩銀四千兩
鈔一千六百錠幣帛一百六十疋 二年定諸王朝會
賜與太祖位金千兩銀七萬五千兩世祖位金各五百
兩銀二萬五千兩餘各有差 大德二年上諭省臣曰
每歲天下金銀鈔幣帛出入幾何諸王駙馬賜與一切
營建所用幾何其會計以聞于是完澤奏歲入之數金
一萬九千兩銀六萬兩鈔三百六十萬錠然猶不足于
用于至元鈔本借二十萬錠自今敢以節用爲請上嘉

納焉爲罷中外土木之役 十一年武宗已卽位進奉
興聖宮金二千七百五十錠銀十二萬九千二百兩鈔
一萬錠幣帛二萬二千二百八十疋賜皇太子亦如之
武宗至大元年中書省臣言今國用甚多帑藏已乏用及
鈔母非宜鹽引向從運司與民爲市今權時制宜從戶
部鬻鹽引入十萬非便有旨今歲姑從所請以後勿復
行又言太府爲內藏世祖成宗朝遇重賜則取給中書
今賜有踰千錠至萬錠者皆取之太府比者太府取五
萬錠已支二萬矣今復以乏告請自後內府所用數多
者仍取之中書帝曰此朕特旨後當從所奏 二年中
書省臣請節財用言今銓選錢糧之法盡壞庫藏空虛

中都建城大都建寺及爲諸貴近營造私第軍民困斃
用度日廣每賜一人動至鉅萬恐至不繼宜暫節縮
三年十月中書省臣言宣徽院廩給日增儲峙雖廣亦
不能給宜加分減帝曰比見后宮飲膳與朕無異有是
理耶其令伯答沙與宣徽院官覈實分減之 四年仁
宗已卽位諭太府監臣曰財用足則可以養萬民給軍
旅自今雖一縑之微不言於朕毋輒輕以與人 十一
月李孟奏錢糧爲國之本世祖朝量入爲出恒務樽節
故倉庫充牣今每歲支鈔六百餘萬錠又土木營繕百
餘處計用數百萬錠內降旨賞賜復用三百餘萬錠比
邊軍需又六七百萬錠今帑藏見則止十一萬餘錠若

此安能周給自今不急浮費宜悉停罷帝納其言凡營繕悉罷之

英宗至治元年以登極大賚諸王百官中書會其數計金五千兩銀七十八萬兩鈔一百二十一萬一千貫幣五萬七千三百六十四疋帛四萬九千三百二十二疋木綿九萬二千六百七十二斤布二萬三千三百九十八疋衣八百五十九襲鞍勒弓矢有差給嶺北驛牛馬造今年鈔本至元鈔五千萬貫中統鈔二百五十萬貫二年三月以國用匱竭停諸王及皇后歲賜省臣復奏請節賞賚以紓民力上曰朕思所出倍于所入出納之際卿輩宜慎之朕當擇節其用三年帝御大安閣見

太祖世祖遺衣皆以縑素木綿爲之重加補綴嗟嘆良久謂侍臣曰祖宗創業艱難服用節儉乃如此朕焉敢頃刻忘之

泰定帝泰定二年五月旭邁傑等以國用不足請減廐馬汰衛士及節諸王濫賜從之七月以國用不足并罷書金字藏經十二月上以災異詔百官集議平章張珪與省院翰林集賢極論當世得失奏之其畧言世祖時不聞中買寶物今分珠寸石售直數萬妄稱呈獻冒給回賜以致累朝未酬寶價四十餘萬較天下所徵歲入止十一萬四千所入僅足以償皆生民膏血請俟國用饒足議還西山建寺損害軍民費以億萬動經年歲

宜且停罷中外署置官吏非世祖初設者宜悉減汰以
節濫費比來惟務徼福僧道病國厲民罷功德使司諸
宿衛宮女之屬宜如世祖支請之數給之凡數千言上
不能從 四年御史辛鈞言西商鬻寶動以數千萬錠
今水旱民貧請節其費不報

文宗天曆元年中書奏賞賚不宜濫及無功鷹鵠獅豹舊
支肉價二百餘錠今增至一萬三千八百錠控鵠舊止
六百二十八戶今增二千四百戶佛事歲費以今比舊
多金一千一百五十兩銀六千二百兩鈔五萬六千二
百錠幣帛三萬四千餘疋請悉減汰從之中政院又言
皇后日用所需鈔十萬錠幣五萬疋綿五千斤詔鈔千

系之屬
所需之半幣給一萬疋爲定制 至順元年秋七月中
書省臣言近歲帑廩空虛其費有五曰賞賜曰作佛事
曰創制衙門曰濫冒支請曰續增衛士鷹坊請與樞密
院御史臺各怯薛官同加汰減上從之

順帝至正四年宣徽院使太平以宣徽典飲膳權勢多橫
索取簿閱之惟太常禮儀使向刺不花一無所需太平
因言於帝擢居近職且厚賜之

諸王皇后公主駙馬歲賜

太祖叔答里真官人位 歲賜銀三十錠段一百疋 工
戶絲一千八百一十二斤 江南戶鈔四百四十錠
太祖弟搠只哈撒兒大王子淄川王位 歲賜銀一百錠

段三百疋 五戶絲三千六百五十六斤 江南戶鈔

一千二百錠

太祖弟哈赤溫大王子濟南王位 歲賜銀一百錠綿六百二十五斤小銀色絲五千斤段三百疋羊皮一千張五戶絲九千六百四十八斤 江南戶鈔二千六百錠

太祖弟幹真那顏位 歲賜銀一百錠綿五千九十八疋綿五千九十八斤段三百疋諸物折中統鈔一百二十錠羊皮五百張金一十六錠四十五兩 五戶絲一萬一千四百二十五斤 江南戶鈔二千八百五十五錠太祖弟孛羅古剌大王子廣寧王位 歲賜銀一百錠段

三百疋 五戶絲一千三百五十九斤 江南戶鈔七

百二十錠

太祖長子朮赤大王位 歲賜段三百疋常課段一千疋

五戶絲五萬一千三百二十斤 江南戶鈔二千四

百錠

太祖次子朮合剌大王位 歲賜銀一百錠段三百疋綿

六百二十五斤常課金六錠六兩 五戶絲六千八百

三十八斤 江南戶鈔二千六百九十三錠

太祖第三子太宗子定宗位 歲賜銀二十六錠三十三

兩段五十疋 五戶絲五千一百九十三斤

太祖第四子睿宗子阿里不哥大王位 歲賜銀一百錠

段疋物料折鈔一千六百五十六錠 江南戶鈔五百四十五錠

世祖次子鎮南王脫歡位 歲賜銀五十錠段疋物料折鈔一千六百五十六錠 江南戶鈔五百四十四錠

世祖次子雲南王忽哥赤位 歲賜銀五十錠折鈔一千錠段疋物料折鈔一千六百五十六錠 江南戶鈔五百四十四錠

世祖次子忽都帖木兒太子位 歲賜銀五十錠折鈔一千錠段疋物料折鈔一千六百五十六錠 江南戶鈔五百四十四錠

裕宗長子晉王甘麻剌位 歲賜段一千疋絹一千疋又

朶兒只年例支中統鈔一千錠 五戶絲益都二十九

戶 江南戶鈔二千六百錠

順宗子阿木哥魏王位 江南戶鈔二千六百錠

順宗子武宗子明宗位 江南戶鈔二千六百錠

合丹大王位 五戶絲七十七斤

阿魯渾察大王 五戶絲二斤

霍里極大王 五戶絲三十四斤

太祖四大斡耳朶 歲賜銀四十三錠紅紫羅二十疋染

絹一百疋雜色絨五千斤針三千箇段七十五疋常課

段八百疋 五戶絲五千二百七斤 江南戶鈔八百

錠

第二幹耳朶 歲賜銀五十錠段七十五疋常課段一
千四百九十疋 五戶絲六百五十七斤 江南戶
鈔六百錠

第三幹耳朶 歲賜銀五十錠段七十五疋常課段六
百八十二疋 五戶絲四十八斤 江南戶鈔八百
四十錠

第四幹耳朶 歲賜銀五十錠段七十五疋 五戶絲
四十六斤 又絲二百四斤

世祖四幹耳朶

大幹耳朶 歲賜銀五十錠 江南戶鈔一千六百錠

第二幹耳朶 歲賜銀五十錠又七錠段一百五十疋

江南戸鈔一千六百八十錠

第三幹耳朶 歲賜銀五十錠 江南戸鈔一千一百

九十錠

第四幹耳朶 歲賜銀五十錠 江南戸鈔一千一百

九十錠

順宗后位 歲賜段五百疋 江南戸鈔三萬一千五百

戸

武宗幹耳朶

真哥皇后位 歲賜銀五十錠鈔五百錠 江南戸鈔

一千六百八十錠

完者台皇后位 歲賜銀五十錠 江南戸鈔一千一

百九十錠

趙國公主位 五戶絲二千三百九十九斤 江南戶

鈔一千八十錠

魯國公主位 五戶絲二千一百九斤 江南戶鈔一

千六百錠

昌國公主位 五戶絲二千七百六十六斤 江南戶

鈔一千八十錠

鄆國公主位 五戶絲一千八百三十六斤 江南戶

鈔一千六百錠

塔出駙馬 五戶絲九十五斤

帶魯罕公主位 歲賜銀四錠八兩段十二疋 五戶

絲二百五十四斤

大雷公主位 五戶絲七百二十二斤

奔忒古兒駙馬 五戶絲二十二斤

獨木干公主位 五戶絲二百二十四斤 江南戶鈔
五十六錠

勲臣歲賜

木華黎國王 五戶絲三千三百四十三斤 江南戶
鈔一千六百四十錠

索羅先鋒 五戶絲二十八斤

行丑兒 五戶絲一十五斤

闊闊不花先鋒 五戶絲一十五斤

撒吉思不花先鋒 五戶絲一十五斤

阿里侃斷事官 五戶絲一十四斤

乞里反拔都 五戶絲四十斤

索羅海拔都 五戶絲六十一斤

拾得官人 五戶絲八十四斤

伯納官人 五戶絲十八斤

帶孫郡王 五戶絲七百二十斤 江南戶鈔四百二

十八錠

笑乃帶先鋒 五戶絲三十一斤

愐里答兒薛禪 五戶絲二千四百二十五斤 江南

戶鈔八百四十錠

木赤台郡王 五戶絲二千九百四十八斤 江南戶鈔八百四十錠

阿里思蘭官人 江南戶鈔一百二十錠

孛魯古妻倭氏 五戶絲一十五斤

八荅子 五戶絲二千四百六斤 江南戶鈔六百二錠

右手萬戶三投下孛羅台萬戶 五戶絲一千七百三十八斤 江南戶鈔七百一十六錠

忒木台駙馬 五戶絲九百八十九斤 江南戶鈔三百九十五錠

幹闊烈闊里必 五戶絲六百八十斤 江南戶鈔六

百四十六錠

左手九千戶合冊大息千戶 五戶絲一百六十斤

江南戶鈔九錠

也速不花等四千戶 五戶絲二百二十三斤

也速兀兒等三千戶 五戶絲二百八十八斤 江南

戶絲一百八十八斤

帖柳兀秃千戶 五戶絲二百六斤 江南戶鈔四十

九錠

和針溫兩投下一千二百戶 五戶絲七百四十八斤

江南戶錠四百二十錠

忽都虎官人 五戶絲廣平等處四千戶 江南戶鈔

二百一十二錠

臧古赤 五戶絲一百三十戶 江南戶鈔二百錠

搭思火兒赤 五戶絲一百五十五斤

搭丑萬戶 五戶絲三十七斤

察罕官人 五戶絲二百二十四斤

索羅渾官人 五戶絲四百四十九斤 江南戶鈔一

百六十錠

速不台官人 五戶絲二百三十斤 江南戶鈔六十

四錠

宿敦官人 五戶絲二十八斤

也苦千戶 五戶絲一百一十八斤 江南戶鈔五十

六錠

阿可兒 五戶絲七十八斤

伯八千戶 五戶絲一百四十斤

兀里羊哈反千戶 五戶絲一百九十一斤

禿薛官人 五戶絲八十斤

搭察兒官人 五戶絲八十斤

折米思拔都兒 五戶絲二十斤

祿虎官人 五戶絲二百四十斤

孛哥帖木兒 五戶絲二十三斤

也速魯千戶 五戶絲一十六斤

鎮海相公 五戶絲二十一斤

按察兒官人 五戶絲二十九斤

按攤官人 五戶絲一十六斤

阿木魯拔都 五戶絲一百二十斤

索羅口下裴太納 五戶絲一十二斤

撒禿千戶 江南戶鈔一百二十錠

也可太傳 五戶絲一百二十斤

迭哥官人 五戶絲五百七斤

卜迭捏拔都兒 五戶絲一十六斤

黃兀兒塔海 五戶絲四十斤

怯來千戶 江南戶鈔一百二十錠

哈刺口溫 五戶絲直片三十二戶

曳刺中書兀圖撒罕里 五戶絲一百十七斤

欠帖木 五戶絲曹州三十四戶

欠帖溫 歲賜絹一百匹弓弦一千條

扎八忽娘子 歲賜常課段四百七十疋

魚兒泊八刺千戶 五戶絲二百四十斤

昔寶赤 江南戶鈔一百六十錠

八刺哈赤 江南戶鈔一百六十錠

阿塔赤 江南戶鈔一百六十錠

必闡赤 江南戶鈔一百六十錠

貴赤 江南戶鈔一百六十錠

厥列赤 江南戶鈔二十錠

八兒赤不魯古赤 江南戶鈔二十四錠

阿速拔都 江南戶鈔一百三十六錠

也可怯薛 江南戶鈔二百錠

忽都答兒怯薛 江南戶鈔二百錠

帖古迭兒怯薛 江南戶鈔二百錠

月赤察兒怯薛 江南戶鈔二百錠

王龍帖木兒千戶 江南戶鈔一百二十錠

別苦千戶 江南戶鈔一百二十錠

懂兀兒玉 江南戶鈔二百錠

霍木海 五戶絲大明等處三十三戶

哈刺赤禿禿哈 江南戶鈔一百六十錠

添都虎兒 五戶絲真定一百戶

賈荅刺罕 五戶絲大都一十四戶

阿刺博兒赤 五戶絲真定五十五戶

忽都那顏 五戶絲大名二十戶

忽辛火者 五戶絲真定二十七戶

大忒木兒 五戶絲真定二十二戶

布八火兒赤 五戶絲大都八十四戶

塔蘭官人 五戶絲大寧三戶

憐刺哈兒 五戶絲保定二十一戶

昔里吉萬戶 五戶絲大都七十九戶

清河縣達魯花赤也速 五戶絲大名二十戶

塔剌罕劉元帥 五戶絲順德一十九戶

怯薛台蠻子 五戶絲泰安州七戶

必闌赤汪古台 五戶絲汴梁等處四十六戶

阿剌罕萬戶 五戶絲保定一戶

徐都官人 五戶絲大都三十一戶

西川城左奕蒙古漢軍萬戶脫力失 歲賜常課段三

十三疋

伯安友千戶 歲賜段二十四疋

典迭兒 歲賜常課段六十四疋

燕帖木兒大平王 歲賜天慶元年定金十錠銀五十

錠鈔一萬錠分撥江東道太平路地五百頃

續文獻通考卷之三十五終